

Gränzgänger



Fasnacht 2015

Achtig Haimlifaiss – Laarven aabe!

1. Gränzgänger Bschysser-Forum

In unserer Stadt git's vyl „Event“,
wo „tout Bâle“ immer ane rennt.
Fir alles het's Kongräss und Mässe,
usser fir s`Bschyse, das het me vergässe !

Das Manggo wänn mir korrigiere,
und s` Bschysser-Forum ney yfiehre.
Nur so herrscht ändlig Transparenz !
Fir jedi Lug e Konferänz !
Frauequote, Klimaschutz,
d` Schädligkait vom Kaffi Lutz:
alles wänn mir hinterfrooge,
ebb`s au woher isch oder glooge!

Bschisse wird in Schrift und Wort !
Bschyse isch hitt fascht e Sport !
Bald wird`s Olympia-Disziplin,
denn git`s e Gold- und Silber-Bschysser/in !
Bruchsch au kai Kurs um sofort z`wisse:
es wird uff alle Stuefe bschisse !
Vertraue isch in unserem Land
so rar wie dr gsundi Menscheverstand!

Wenn aine frindlig dräggig liegt,
dass är fir sich e Vorteil griegt -
Wenn aine nit zur Wohret stoht,
damit `s em nit an Kraage goht -
Wenn aine sait, är dät nyt wisse,
und haig uf kai Fall gar nit bschisse !
Denn sait me däne, wie me waiss,
myysi Veegel und Haimlifaiss !

Maischtens lehrsch die vyl z`spoot kenne ;
mir wänn aber doch e baar benenne.
Die reede nit an unserem Forum,
si hätte au nit s`neetig Quorum !!

Ain wär soo gärn an s`Forum ko,
und hätt sofort dr Vorsitz gno !
Doch das goht nit – är isch kai Bschysser,
är gheert nur zue de Besserwisser !
Wär alles verkündet, was er maint dass er s`waiss,
isch s`Gegedail vome Haimlifaiss !
Är glaubt, als rächte **Christophorus**,
retti är d`Schwyz uss em Fremd-Y-Fluss.
Vom Ufer här riefte si: „ Pitié - pitié :
suechet d`Zuekunft nit hinde! S`il Vous Plait ! „

Vom Tal mit em Färnseh-Dialägg
kunnt ain, dä isch scho lang suschpäggt!
Är förderet s`Schutte in dr Wält,
und kassiert e Huffe styrfreys Gäld !
In alle Länder jede waiss:
das isch dr FIFA Haimlifaiss !
Dr Fuessball-WM-Schaich z`Katar
schmiirt step bei **Sepp**: Allah akhbar !
Und d` Campus - Kinder juble froh:
„FI-FA-FO : är isch no do !“

D`Wält isch voll vo grangge Bangge,
Gäld kasch nimm so aifach tanke,
dr Akziemärt isch e Roulett,
rych wirsch nur per CD-Set !
Luegsch ime Bängger unters Bett,
pass uff, ob `s nit e **Waespi**-Näscht hett!
G`handlet wird mit dr Prämisse:
„Fair manipuliert isch nonig bschisse“.
Muess aine denn 3 Joor uff d` Reis,
isch`s nimm e coop-erative Haimlifaiss !

E Magistrat – jää git`s die noh ?-
het unverhofft s`Roothuus verloh.
Und das als truurigi Konsequänz
von-ere Speese In-**conti**-nänz !
Är brucht aber kai Carlos-Therapie –
är isch scho wider naime anders drby !
Alli beduure`s, well me waiss,
är isch en ehrlige Haimlifaiss !

S` **Wesseli**-Loch isch kai Ussflugs-Ziel !
Das liggt in Basel und s`het drvo z`vyl - vyl z`vyl!!
Vor luter Baustelle, Konzäpt und Schikane,
kasch mit em Auto fascht niene meh ane.
S`syg guet fir d`Stadt und d`Aktiviteet !
S`isch fyr d`Velo !! – mir sin doch nit bleed !
Defäggt isch d`Laitig, nit unde s` Gleis !
S`regiert halt e Umlaitigs-Haimlifaiss !

Im Hotel „Zum **Gaugkler**“ in Lause BL,
isch schynbar einiges nit so reell!
Dert griegsch s` Zmorge sogar ins Bett,
obwoll „Bed and Breakfast“ kai Bewilligung het !
Dr Landroot diskutiert dä Fall ganz wild :
Alli wisses – aber kain syg im Bild !
Wenn kchaine will zuegeeh, dass er `s waiss,
de hei mer e Chratte voll Haimlifaiss!

Erstuunlig isch – wurdsch `s nit verroote:
Bschyse kennt kai Frauequote !

In Bärn läbt s`Kiener Nullen **Greti**.
Die isch e raffiniert diskreeti !
Si wirft im Ammann Styrflucht vor,
het aber die aigeni Subbe voll Hoor !
D`Styr an dr Nase ummefiehre,
nennt si stinggfräch „optimiere“.
Im Root und wyt in Bärn me waiss:
si isch dr Prototyp vome Haimlifaiss !

Usstieg-Stress het s` Leuthard **Doris**.
Si firchtet nukleari Hoor-Riss !
Zerscht fir d`Kärnkraft Fyyr und Flamme,
denn Atom-Strom ganz verdamme !
Wäxlesch so als Bundesroot Dy Gleis,
bischi kai erneuerbari Haimlifaiss !

Arslang sible, koche, bache ?? Nai!!!
Frau muess hytt Karriere mache !
E Kaderstell bi Baselland
schynt aifach - mit dr lingge Hand !
Muesch nur e grieni Linggi sy,
by Chaote-Demo gärn drby,
und e weneli bitzli Schulde ha.
S`klappt aber nit ! BAZ da . BastA !
Abserviert - politisch z`heiss,
kunnt die Haimlifaiss uf s` Stumpegleis !

Es war einmal ein **Stadtammann**
in Baden, der hat dann und wann
ein Selfie von sich selbst gemacht,
worüber alles schregglic lacht !
Man soll halt in den Büroräumen
ein Esel nicht am Schwanz aufzäumen !
Jetzt ist die Weste dunkelweiss
des phallogenen Heimlifaiss !

Kemmet an s`Gränzgänger Bschysser-Forum,
und frooget nit lang worum: DORUM !

Vom Määntig znacht bis am Mittwoch demoorge kasch
uff em Minschterplatz und em Kasärnen-Areal d`Ladärne-,
d`Waagen- und Requisiyten-Uustellig go aaluege!

Kumm doch au in unsere Glygge-Käller
an dr Theaterstrooss 20

www.graenzgaenger.ch